

〔清〕朱彝尊 輯錄

明詩綜

第六冊

中華書局

朱彝尊
輯錄

明
詩
綜

第六册

中
華
書
局

明詩綜卷五十八

小長蘆 朱彝尊 錄

休陽 程 岳 緝評

朱之蕃 一首

之蕃字元介，南京錦衣衛籍，在平人。萬曆乙未賜進士第一，授翰林院修撰，以右春坊、右諭德掌院印，以右春坊、右庶子掌坊印，升少詹事，進禮部右侍郎，改吏部右侍郎。卒，贈禮部尚書。有《使朝鮮稿》、《南還紀勝》諸集。

《靜志居詩話》：元介文翰兼工，張廬東國，與館伴周旋，有倡必和。微嫌詩材悞熟，語不驚人。

和周吉甫春日移居

牆短山齋出，庭空月易留。泉香浮茗盃，漁唱起蘋洲。終歲一無事，平生百不憂。奔忙渾未解，酒伴且相求。一作「自苦復何由。」

湯賓尹一首

賓尹字嘉賓，宣城人。萬曆乙未賜進士第二，授翰林院編修，歷中允，論德，掌司業事，遷右庶子，升南國子監祭酒。有《睡菴集》。

《詩話》：嘉賓以黨論受攢譏，終以不振。詩派近俚，罕足錄者。詩中所弔，懷寧於國重也。

弔同年友於鼎季

落木淒淒江水渾，行吟澤畔已聲吞。三年地下君安否？人世風波不可言。

孫慎行一首

慎行字聞斯，武進人。萬曆乙未賜進士第二，授編修，歷中允，諭德，庶子，少詹事，升禮部右侍郎，回籍，起南京禮部尚書，改北。卒，贈太子太保，諡文介。有《玄晏齋集》。

《詩話》：《要典》三案，群小切齒者。挺擊，則朝邑王侍郎；移宮，則應城楊忠烈；紅丸，則文介也。《要典》既頒，至欲坐公等罔上不道，幾且殺公。幸思陵即阼，得辭戍所，復官。仍堅卧不起，久而赴召，甫及都而卒。平居研精《易》學，吟咏不甚留意。其《觀元祐黨人碑有感受》云：「誰知黨人籍，翻作褒忠碑。」曠世相感，今古同然矣。

遭遇

誰料恩深放棄餘，山人猶帶舊銜居。中山篋在猶寒膽，上殿爭時判引裾。天地有情開一網，江湖無夢到三閭。自來多少歎歎感，聖主英明古不如。

劉一燝一首

一燝字季晦，南昌人。萬曆乙未進士，改庶吉士，授檢討，歷官禮部尚書，兼東閣大學士，加太子太保，戶部尚書，進文淵閣，加少保，再進少師，兼太子太師，吏部尚書，中極殿大學士。卒，贈太師，諡文端。有集。

歸田作

乞得閒身返故林，避賢者路漫沉吟。當歸分合山中老，戀主情彌闕下深。鑿井耕田歌帝力，量情較雨答天心。十年塵夢今番破，一曲滄浪思不禁。

陳于廷五首

于廷字孟諤，宜興人。萬曆乙未進士，授光山知縣，補秀水，擢監察御史，巡按江西、山東，轉太僕少卿，歷太常卿、大理卿，兵部侍郎，坐削籍。起南京都察院右都御史，召總內臺，加太子少保。諡恭定。有《定軒稿》。

《詩話》：恭定爲子友其年檢討之祖，行事詳國史。韻語不甚傳，擬江文通雜詩，頗稱具體。

古別離

三歲爲君婦，未嘗下高堂。一朝遠送別，佇泣官道傍。君行官柳青，君歸官柳黃。與君別經年，相思莫相忘。行過無定河，莫飲無定水。天涯游子心，飲之恐爾爾。應思閨中人，容光易摧毀。

擬陳思王贈丁儀王粲

王師入京邑，天宇俄廓清。九廟肅鐘簫，十陵翦棘荆。皇路日就坦，相君靡自盈。吐哺則公旦，闕門羅雋英。黃髮縹珪組，深巖賁弓旌。嗟余同心侶，夙昔諧嚶鳴。胡爲慕孤介，堅欲解世纓。延陵匪通誼，干木庸近情。願回墨子車，且過朝歌城。

擬王侍中粲懷德

關中搆喪亂，浮渭向洛城。京雒復殘破，子身遁蠻荆。虎兕傷在野，流離嗟獨行。河山邈非故，魂魄黯自驚。乘桴浮海若，登樓眺神京。目斷秦川樹，心搖伊闕旌。哀哀孤飛鳥，詎有擇木情。公子忽我覲，歎唾分瓊瑛。魚藻醉明德，鹿苹廣和鳴。鄙人守貞則，嘉惠懷篤誠。所期慎厥修，福履永不傾。

擬謝僕射混遊覽

大塊真勞生，俯仰日縈感。內庭鮮歡棕，遠郊豁幽覽。寓目極寥廓，開襟愜澄澹。巖阿秀菊庾，江澹揭葭萋。會歎景搖落，任觀運流坎。代謝亦何常，章光總歸闇。達人遺浮榮，自視一何飲。

擬休上人怨別

楚客思無賴，涉秋逾黯然。金飈起天末，槁葉墮我前。素帷延華月，淨琴響哀絃。白雪懷郢人，滄洲憶成連。壺觴對不舉，何以暢幽悁。

王維儉一首

維儉字損仲，祥符人。萬曆乙未進士，除知濰縣，徵授兵部主事，尋削籍。起光祿寺丞，累遷大理少卿，以僉都御史撫山東，人爲工部右侍郎，轉左侍郎。有《王損仲集》。

錢受之云：損仲詩清婉，而近于弱，爲文求歸簡質，未脫蹊徑。嘗苦《宋史》煩蕪，刪定成書。吳興潘昭度抄得副本。今損仲家圖籍，盡沉于汴京之水，未知吳興抄本云何？

《詩話》：損仲《宋史記》，予從吳興抄得之，未見出人意表。詩頗瀏亮。

送霍臨渠少府守河州

不盡湟中路，秋風促宦程。佩刀辭佐郡，分虎已專城。積石攢雲起，洮河近郭明。羌戎亦赤子，休使塞烟驚。

王思任一首

思任字季重，紹興山陰人。萬曆乙未進士，知興平、當塗、青浦三縣，袁州推官，所至鑄級。稍遷南刑部主事，九江僉事。有《避園擬存》《虞山詠》

錢受之云：季重頗負時名，自建旗鼓。其詩才情爛熳，無復持擇，人鬼入魔，惡道全出。鍾、譚之外，又一傍派也。

《詩話》：季重滑稽太甚，有傷大雅。

勺園

纔辭帝里入風烟，處處亭臺鏡裏天。夢到江南深樹底，吳兒歌板放秋船。

蔡復一 二首

復一字敬夫，同安人。萬曆乙未進士，除刑部主事，歷員外、郎中，出爲湖廣參政，遷按察使，仕至兵部右侍郎。卒，諡清憲。有《遜菴詩集》。

《詩話》：景陵之邪說行，率先倒戈者，蔡敬夫也。其駢體亦不屑猶人，亡友漢陽王亦世最賞之。然以詩論，寧取彼而舍此矣。

秋坐

夕照盡歸水，秋聲半在林。飛蟬過別樹，未斷曳來一作「舊音。」枝。

夕陽

夕陽欲下山，一半戀流水。短笛牛羊歸，餘光照童子。

高承祚一首

承祚初名承禪，字元錫，號鶴城，松江華亭人。萬曆壬辰中會試，乙未賜同進士出身，改庶吉士，授檢討。有《知古堂集》。

董思白云：鶴城豪飲過人，酒邊賦詩，自運機局。

《詩話》：太史生時，父夢高僧入其門，因名之曰承禪。及萬曆己卯，銅梁高中允啓愚、會稽羅侍讀萬化，主考南畿，以「舜亦以命禹」發題。監臨者方懷舜、禹傳授之嫌，內江陰長卿爲應天府尹，改填榜作「祚」。後主司以黨附江陵獲罪，鶴城以更名，免挂吏議。鶴城廉介自持，官翰林二十年，田不加半畝，屋不改一椽。予聞之李高士延是云。

聚首

人生聚首難，離別何可久。去日三春花，今朝九秋柳。

沈覃九云：語不在深，詩家合作。

賀燦然二首

燦然字伯闇，秀水人。萬曆乙未進士，授行人，升吏部主事，終員外。有《六欲軒》《五欲軒集》。

《詩話》：吳中伍御史袁萃撰《林居漫錄》，詆譏前輩，淆亂是非。吏部不平，作《漫錄評正》駁之。御史復撰《駁漫錄評正》，吏部又作《駁駁漫錄評正》。兩公不亦好辨哉！然合而觀之，曲直自見，國史所宜審擇也。

泊彭城

山城多宿雨，日暮起悲風。賈客行將絕，中涓計已窮。叩閭雙闕迴，縣磬九州同。應有輪臺詔，朝來出漢宮。

邯鄲懷古

雲迷襄國雨霏微，舊日叢臺過客稀。三晉河山仍不改，六王宮殿已全非。照眉池冷荒臺合，講武臺空野雀飛。猶有邯鄲樓上月，餘光常照酒人歸。

米萬鍾一首

萬鍾字仲詔，宛平人。萬曆乙未進士，除永寧知縣，補銅梁，再補六合，人爲大理右評事，遷戶部主事，升員外，改工部，進郎中，出爲浙江右參政，升江西按察使。有《北征吟》。

《詩話》：先生爲水曹郎，築園海淀之北，中有色空天、太一葉、松垞、翠葆樹、林於澁，總名之曰勺園，又曰風烟里。自念園在郊關，不能日涉，因繪園中景爲燈。丘壑亭臺，纖悉具備，都人爭尚之，號曰「米家燈」。嘗於元夜集客賦詩，麗水呂太常邦耀即席口占二首，其一云：「玉綃疊出上元村，雙炬懸來景物繁。恍惚重游丘壑裏，米家燈是米家園。」其二云：「輕舟寒夜渡無冰，波人銀綃訝月升。宛似夢中曾一照，米家園是米家燈。」一時和者數百人，列成一集，可稱好事，亦太平佳話也。

新秋泛清溪

共客邀新爽，回舟刺晚風。涼生思越苧，病起訝燕鴻。星耀搖虛白，漁燈簇小紅。怪來蕭颯早，衰草怨吳宮。

范允臨二首

允臨字長倩，松江華亭人，居吳縣。萬曆乙未進士，授南兵部主事，改工部，歷郎中，以按察僉事提學雲南，遷福建布政司參議。有《翰寥館集》。

錢受之云：長倩意匠浮動，墨瀋橫飛，未嘗以琢句劈績爲工，如雪山池中甄陀女，歌聲柔軟，能使清淨五百仙人，皆心逸不自持。

《詩話》：先生筆精墨妙，揮毫落紙，與董尚書爭工。晚築別業於天平山之陽，彈絲吹竹，選伎徵歌，江表望爲神仙中人。又得佳耦唱和，傳鈔片楮，比於珊瑚之鈎。范氏家藏遠祖隋其唐時告身尚在，文正、忠宣諸老手澤猶新。義田長以振窮，宰木未嘗改列。清門百代，四姓遠不及也。

有憶

井唾不復顧，花飛難再攀。
江頭一片石，應化女郎山。

詠翦春羅

君恩宴曲池，爲郎製宮錦。
月落杏花寒，裁縫剪刀冷。

沈琦二首

琦字仲玉，吳江人。萬曆乙未進士，除淄川知縣，以憂歸。起補高陵，再調三原，人爲禮部主事。
有《珠樹軒稿》。

送馬長山擢守橋李

我家住江南，只盼江南路。君今正向江南行，却望君家又回顧。執手空嗟離別難，齊人感咽越人歡。
只今南北蒼生望，總向循良傳裏看。憶昔交君頓成契，芝蘭金石盟前締。相逢春日春更融，相別秋風

秋轉厲。江南土俗舊清嘉，到處風光盡可誇。天目峰頭雲吐月，餘杭城外水漂花。天子黃扉方側席，致治思同二千石。語君暫作江南行，會捧徵書向江北。

別家次諸兄弟韻

握手他鄉路，回頭故國城。漸驚親舍遠，真覺一官輕。急懼隨雲影，悲笳雜雁聲。無情東去水，相對亦淒清。

沈琬一首

琬字季玉，琦弟，與兄同榜登第。由鳳陽府學教授，遷南國子監博士，升南刑部主事，歷郎中，出知東昌府，轉山東按察副使。

漂母

偶然一飯進王孫，答贈千金未足論。何事怨家還報德，淮陰年少亦推恩。

陸錫恩 一首

錫恩字伯承，平湖人。萬曆乙未進士，除萬安知縣，人爲刑部主事，歷員外郎。有《雙鳧草》。

《詩話》：伯承不耐判牘，放情山水間，自號夢蝶居士，又號癯丈人，亦號癡丈夫。年四十二，自撰墳誌而殞。詩頗澹雅。

鮑叔牙故里

落景滿齊郊，雲橫暮山紫。緩轡問遺封，云是鮑叔里。三北識奇才，一匡酬夙恥。古人在信心，今人多貴耳。士苟未遇時，畢生行蓬累。長風不我借，羽翼安得起。所以管大夫，沒齒感知己。

袁時選 一首

時選字無擇，鄆縣人。萬曆乙未進士，除遂溪知縣，遷南刑部主事。